



## PRIVREDNA KOMORA KANTONA SARAJEVO

Broj: 04/MK/ 16-22-2 /12  
Sarajevo, 21.05.2012. godine

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
**VLADA KANTONA**  
71000 SARAJEVO, Reisa Džemaludina Čauševića 1

### **PREDMET: Primjedbe, prijedlozi i sugestije na Nacrt zakona o izmjenama i dopunama Zakona o komunalnim taksama**

Podržavajući usklađivanje postojećeg Zakona sa Presudom Ustavnog suda Federacije Bosne i Hercegovine, iako se radi o manjim izmjenama, članovi Privredne komore Kantona Sarajevo su uzeli učešće u javnoj raspravi o Nacrtu zakona o izmjenama i dopunama zakona o komunalnim taksama.

Dostavljamo vam **primjedbe, prijedloge i sugestije Privredne komore Kantona Sarajevo.**

### **I – PRIMJEDBE I SUGESTIJE**

Osnovna primjedba privrednika odnosi se na činjenicu da u domaćem zakonodavstvu, prilikom donošenja zakona i drugih propisa, iz bilo koje djelatnosti, veliki problem predstavlja neusaglašenost datih zakonskih rješenja sa drugim propisima. Takav slučaj je i sa Nacrtom zakona o izmjenama i dopunama Zakona o komunalnim taksama koji nije u skladu sa pojedinim tačkama Odluke o uslovima i načinu obavljanja mjenjačkih poslova, kao i Zakonom o Centralnoj banci BiH.

### **II – PRIJEDLOZI**

- **U Nacrtu zakona, u članu 6. pod tačkom 51. mjenjačnice, umanjiti iznos naknade.**

#### **Obrazloženje:**

U Nacrtu zakona predložena je taksa za mjenjačnice u visini od 1.000,00 KM što je za mjenjačnice neprihvatljivo. Prema tački VIII. Odluke o uslovima i načinu obavljanja mjenjačkih poslova („Službene novine FBiH”, broj: 58/10) provizija i druge naknade za mjenjačke poslove ne mogu biti veće od iznosa koji je propisan Zakonom o Centralnoj banci BiH („Službeni glasnik BiH”, broj 1/97 i 29/02), kojim je uređeno da maksimalna provizija ne može biti veća od 1%.



71000 Sarajevo, La Benevolencija 8  
Tel: (00 387 33) 250 100, 250 101, 250 196 Fax: (00 387 33) 250 137, 250 139  
[www.pksa.com.ba](http://www.pksa.com.ba), [webmaster@pksa.com.ba](mailto:webmaster@pksa.com.ba)



Član 7. stav 2. Zakona o Centralnoj banci glasi:

"2. Komercijalne banke i druge ovlaštene finansijske institucije u Bosni i Hercegovini na zahtjev kupuju i prodaju konvertibilnu marku za euro, bez ograničenja i po kursu određenom u članu 32. ovog zakona. Maksimum njihove provizije, taksi i drugih naplata za ovakve transakcije ne može iznositi više od 1%."

- **Oblast poredovanja u osiguranju razvrstati pod poseban Tarifni broj i predvidjeti maksimum za sjedište, filijale i izdvojene dijelove prilagodene trenutnom obimu poslova i finansijskoj mogućnosti posrednika. Prijedlog: maksimalna obaveza posrednika za ove namjene mogla bi iznositi: do 600,00 KM za sjedište, 200,00 KM za filijalu i 50,00 KM za izdvojeni dio.**

### **Obrazloženje:**

Djelatnost posrednika u osiguranju je propisana Zakonom o posredovanju u privatnom osiguranju (Službene novine Federacije BiH broj 22/05). Predloženim Nacrtom, a i ranijim odredbama, Zakona o komunalnim taksama Kantona Sarajevo, posredovanje u osiguranju je razvrstano u grupu sa društvima za osiguranje i reosiguranje, jer je Tarifnim brojem 1. propisano:

Tačka 17. "Iz oblasti osiguranja i reosiguranja i posredovanja u osiguranju i reosiguranju (sjedište) 10.000,00 KM"

Tačka 18. „Iz oblasti osiguranja i reosiguranja i posredovanja u osiguranju i reosiguranju (filijala) 2.000,00 KM“

Tačka 19. „Iz oblasti osiguranja i reosiguranja i posredovanja u osiguranju i reosiguranju (izdvojeni) 500,00 KM“

Djelatnost posredovanja u osiguranju po ukupnom godišnjem obimu posla (prihoda), a time i dobiti, apsolutno nije moguće porediti sa djelatnošću osiguravajućih društava. Osiguravajuća društva, uglavnom, ostvaruju značajnu dobit na godišnjem nivou, a godišnji portfelj ovih društava (fakturisana premija) mjeri se u milionskim iznosima. Suprotno ovom, posredovanje u osiguranju na teritoriji Bosne i Hercegovine je nova djelatnost, koja je još uvijek nerazvijena zbog stanja na tržištu. Ujedno posrednici u osiguranju ostvaruju svoj prihod temeljem provizije po osnovu naplaćene premije osiguranja u kojoj su posredovali. To znači, da posrednici u BiH gotovo nikada neće biti u mogućnosti imati provizijski prihod od npr. KM 60.000.000,00 iz jednostavnog razloga što klijenti odnosno osiguranici trebaju prvo uplatiti premiju osiguranja u kojoj je posrednik posredovao, da bi posrednik tek onda fakturirao svoj provizijski prihod koji je u prosjeku 15% od naplaćene premije osiguranja. Nametanje tako visokih komunalnih taksi za ovu djelatnost samo će ubrzati gašenje postojećih posrednika u osiguranju, bilo brokerskih društava ili zastupnika. Iz ovog razloga razvrstavanje posrednika u osiguranju u istu kategoriju sa društvima za osiguranje i reosiguranje i obavezivanje na plaćanje komunalnih taksi nije primjereno i kranje je nepravično. Stoga predlažemo da se oblast poredovanja u osiguranju izmjenama Zakona o komunalnim taksama razvrsta pod poseban Tarifni broj i predviđeni maksimum za sjedište, filijale i izdvojene dijelove prilagodi trenutnom obimu poslova i finansijskoj mogućnosti posrednika.

Nadamo se da ćete uvažiti date prijedloge Privredne komore Kantona Sarajevo.

S poštovanjem,

**PREDSJEDNIK**

**Kemal Grebo, dipl.oec.**